

Na osnovu čl. 36. i 37. Statuta Mešihata Islamske zajednice Sandžaka, Mešihat na svojoj redovnoj sjednici održanoj 15.03.2020. godine u Novom Pazaru, donio je

ODLUKU

o pravima, obavezama i ograničenjima vjerskih lica i visokih funkcionera

Mešihata IZ Sandžaka

u pogledu političkog angažmana

I

Ovom odlukom uređuju se prava, obaveze, odgovornost i ograničenja vjerskih lica i visokih funkcionera Mešihata Islamske zajednice Sandžaka (u daljem tekstu Mešihat), u pogledu njihovog političkog angažmana i odnosa spram izbornih procesa za sve nivoe državne vlasti u Srbiji, odnosno teritorije koju pokriva Mešihat (Novi Pazar, Tutin, Sjenica, Prijepolje, Nova Varoš i Priboj).

II

Vjerska lica i visoki funkcioneri Mešihata uživaju sva građanska i politička prava u pogledu slobodnog političkog uvjerenja, uključujući pravo da po vlastitom uvjerenju glasaju za bilo koju političku organizaciju ili pojedince na izborima koji se, u skladu sa relevantnim zakonodavstvom u R. Srbiji, organiziraju i provode za sve nivoe državne vlasti (opštinski i državni nivo).

III

Mešihat je svjestan važnosti i delikatnosti misije koju političke organizacije i njihovi predstavnici imaju, zato sa velikim poštovanjem i uvažavanjem gleda na svaki njihov angažman koji služi dobrobiti svih građana i koji je u skladu sa islamskim pravilima i načelima.

Međutim, uvažavajući činjenicu da su političke organizacije partikularne a temeljni ciljevi i vrijednosti koje Mešihat štiti i promovira univerzalne i trajne, Mešihat ima pravo i obavezu biti u ekvidistanci od bilo koje pojedinačne političke organizacije kako bi uspio sačuvati spomenute vrijednosti za koje se zalaže.

IV

Vjerska lica i visoki funkcioneri Mešihata u ličnom privatnom kapacitetu ne mogu biti u organima niti na funkcijama u političkim organizacijama.

V

Vjerskim licima i visokim funkcionerima Mešihata strogo je zabranjeno učestvovati odnosno kandidirati se na izbornim listama političkih organizacija za bilo koji nivo vlasti, kao i javno istupati na političkim skupovima kojima se propagira ili agitira glasanje za određenu političku organizaciju.

Vjerskim licima i visokim funkcionerima Mešihata strogo se zabranjuje javno agitiranje i/ili poziv na glasanje za bilo koju pojedinačnu političku organizaciju, posebno u vrijeme održavanja izbora, u svim objektima koji su u jurisdikciji Mešihata (džamije, mesdžidi, medrese, obdaništa, škole Kur'ana i dr.).

VI

Vjerska lica i visoki funkcioneri Mešihata u slučaju da žele biti kandidirani na izbornim listama političkih organizacija ili žele biti na funkcijama ili članovi u organima neke od političkih organizacija, prije objavljivanja izborne liste ili izbora na funkciju ili članstvo u organima političke organizacije, moraju podnijeti zahtjev za prekid svog radnog angažmana u Mešihatu i/ili podnijeti ostavku na funkciju u organima Mešihata, u suprotnom, nadležni organ Mešihata ima pravo jednostrano donijeti odgovarajući pravni akt o prekidu radnog angažmana, odnosno odluku o razrješenju sa funkcije u organima Mešihata dotičnog službenika Mešihata.

VII

Odredbe ove odluke ne odnose se na prisustvo visokih funkcionera Mešihata zvaničnim javnim skupovima političkih organizacija u slučajevima:

- Svečanih akademija, komemoracija, kongresa/skupština političkih organizacija kada se održavaju izvan perioda izbornih kampanja, i to samo u slučajevima kada su predstavnici Mešihata zvanično pozvani;
- Svečanih akademija, obilježavanja zvaničnih datuma i/ili obljetnica koje organiziraju bilo koji nivoi vlasti, organizacije civilnog društva i/ili nacionalna vijeća u Srbiji, kada su predstavnici Mešihata zvanično pozvani;

VIII

Mešhat IZ Sandžaka jedini je ovlašten, pored Sabora, obraćati se javnosti u kontekstu iznošenja javnih stavova Mešihata tokom izbornih procesa koji se provode na teritoriju na kojem djeluje Mešihat.

IX

Ova odluka obavezujuća je za sva vjerska lica i visoke funkcionere Mešihata.

Za provedbu i nadzor odredbi ove odluke Muftija će formirati posebnu petočlanu Komisiju koja će se sastojati od istaknutih vjerskih autoriteta Mešihata.

Postupanje i djelovanje suprotno odredbama ove odluke za sobom povlači svaku vrstu odgovornosti u skladu sa zakonom, Statutom Mešihata i općim aktima Mešihata IZ Sandžaka.

X

Ova odluka može se dopunjavati i/ili mijenjati od strane Mešihata.

XI

Odluka stupa na snagu danom donošenja.

Novi Pazar,
15.03.2020.

Predsjednik Mešihata Islamske
zajednice Sandžaka
Muftija Senad ef. Halitović



OBRAZLOŽENJE

Uvažavajući činjenicu da su političke organizacije (partije, stranke, nezavisne liste i sl.) po svojoj prirodi, ulozi i interesima partikularne, kao i da su pripadnici Mešihata IZ Sandžaka, kako službenici tako i ostali vjernici, ujedno i simpatizeri ili članovi u različitim političkim organizacijama, Mešihat IZ Sandžaka ima obavezu zaštititi univerzalna načela islama i jedinstva muslimana kao zdrave zajednice. Ovo čim prije jer islam kao vjera nadilazi političke i ideološke

partikularizme, nacionalne identitete kojima muslimani na našim prostorima pripadaju (Bošnjaci, Albanci, Romi, Turci i dr.) kao i jezičke i rasne raznolikosti.

Svjedoci smo posljednjih decenija da se vjera, kao i vjerske zajednice, od strane pojedinih političkih aktera grubo zloupotrebljavaju u političkom diskursu. Umjesto pozitivnih utrkivanja za dobrobit ukupne zajednice muslimana u Sandžaku, izborne kampanje, nažalost, dovode do udaljavanja, nesporedazuma, svađa i čak do prekida komunikacije između muslimana.

Duboko svjesni da jedno društvo u svojoj ukupnosti, pored političkih organizacija, oblikuju i drugi društveni subjekti – akademska zajednica, vjerske zajednice, organizacije civilnog društva, sportske i kulturne institucije i drugi, zaključili smo da se Mešihat IZ Sandžaka treba odrediti prema izbornim ciklusima i procesima, na način i u ulozi koja joj pripada.

U tom kontekstu Mešihat IZ Sandžaka dužan je učestvovati, putem svojih organa i tijela u svim društvenim procesima, pa tako i političkim izborima, ali na način da mora ostati, u mjeri u kojoj je to moguće u vremenu u kojem živimo, van direktnih političkih arena, odnosno da ne smije ulaziti u politički ring, već nastaviti pozivati na pozitivne promjene i ohrabrivati procese koji „pozivaju na dobro a odvrćaju od zla“.

Mešihat IZ Sandžaka svoju ulogu ostvaruje putem organa, odnosno vjerskih upošljenika i funkcionera i minimum koji se treba definirati jeste da oni ne trebaju i ne mogu biti direktni akteri u politici, kako je predloženo ovom odlukom. Dakle, minimum je da vjerska lica i visoki funkcioneri Mešihata IZ Sandžaka ne mogu biti na listama političkih organizacija i da ne mogu biti u organima i na funkcijama u političkim organizacijama. Ukoliko se ipak odluče za takvu vrstu aktivizma trebaju podnijeti ostavke na funkcije u organima Mešihata IZ Sandžaka kako bi institucija Mešihata IZ Sandžaka ostala na svojim univerzalnim načelima i principima.

Istovremeno Mešihat IZ Sandžaka ostaje vjeran svojim razlozima postojanja, a to jeste propagiranja islamskih vrijednosti u društvu, te tako ostaje otvoren za saradnju sa svim subjektima koji učestvuju u oblikovanju našeg društva, pa tako i političkim organizacijama.